

REPLY BUDGET ADDRESS 2026

Leader of Government Business

Madanm Speaker

Koleg Onorab

Minis

Tou dimoun alekout

Bonzour

Bidze 2026, delivre zedi pase par Minis Finans, Myse Pierre Laporte, I premye bidze kin gany prezante devan sa Lasanble par en Gouvernman United Seychelles anba gidans Prezidan Patrick Herminie.

Sa bidze I vin mwens ki 5 mwan apre ki lepep Seselwa ti deside ki ti'n ler pou en nouvo direksyon, en nouvo Prezidan e en nouvo Lasanble Nasyonal.

Aprè 5an anba en ladministrasyon LDS, Seselwa ti deside vot pou en Gouvernman ki pou gouvern pou la mazorite e non pa zis pour serten.

Lepep **Madanm Speaker**, ti vot pou lazistis sosyal olye ki privez ek inegalite.

Pour en Gouvernman ki delivre dan lavi dimoun olye ki zis felisit son lekò lo papyè.

Atravè son swa demokratik, lepep Seselwa tin deklare ki zot tin gany ase.

Madanm Speaker,

Sa bidzè ki Minis Finans ti delivre Zedi pase, I met an aplikasyon swa lepep Seselwa pou en nouvo direksyon.

Sa bidzè I form labaz sa nouvo kontra sosyal ant lepep e Gouvernman US, dirizè par Prezidan Patrick Herminie.

Bidze 2026, I etabli priorite nou nouvo Gouvernman e priorite **Madanm Speaker**, I byenet, dignite e prosperite lepep Seselwa.

Mon felisit e remersi Minis Pierre Laporte avek son lekip kot Minister Finans pou prezant Lasanble avek en bidze ki onor bann langazman ki Prezidan Patrick Herminie ti fer avek lepep.

Mon konnen ki zot in travay dir, sirtou apre bann revizyon kin bezwen gany fer.

Me zot travay I demontre ki profesyonel Seselwa I kapab e ki zot travay dir pou fer avanse nou pei.

Mon kontan vwar ki bidze in rekonet rol travayer Seselwa dan devlopman pei atraver diferan mezir e propozisyon konsernan saler.

Madanm Speaker, profesyonel, teknisyen e travayer Seselwa an zeneral pa bezwen gany micro-managed.

Si nou donn nou bann travayer direksyon, lespas, lankourazman, respe e byensir, asire ki nou pe rekonet e rekonpans zot travay, mon konnen **Madanm Speaker**, parey nou pe vwar anba leadership Prezidan Patrick Herminie, ki travayer Seselwa pou delivre.

Pou bann ki ti pe doute, ki ti pe demann kestyon, mon kwar ki Minis Laporte byen boner dan son diskour in reponn zot kestyon e la mon sit Minis: Bidze 2026, in rann dwa bann travayer, in reetablir bann benefis sosyal, in soutenir bann fanmiy e in fer tou sa la dan en kad fiskal ki responsab e soutenab. I normal alor pou lider lopozisyon dir ki I pa dakor avek sa bidze aköz zot pa kwar dan partaz larises pei avek tou dimoun. Pou zot zis serten ki merit ganny par dan sa larises. Sa larises ki Onorab Georges I dir zot in kre, Selman zis serten ki ti pe viv dan lopilans ki ti pe benefisye. Eski zot ti pe

deliberaman kit pep Seselwa dan lamizer? Kestyon pou LDS.

Madanm Speaker

Lopozisyon I lib pou dir sa ki zot anvi.

Me le fe I reste ki tou sa bann largiman ki LDS in vin avek, in vin parey sa vye rikord reye ki Seselwa in fatigue tande.

Rezon I tre senp: Si Seselwa ti pe viv dan en paradi parey zot pe fer nou kwar, si zot tin sitan byen manage nou lekonomi, si rezerv labank santral tin sitan deborde, si zot ti pe fer sitan sikse, devlopman e menm listwar parey nou pe tande, akòz ki lepep Seselwa in fer zot vin listwar e met zot deor apre zis 5an?

Madanm Speaker

Ler noun ekout bann manm LDS koze lo diskour Prezidan Herminie lo leta nasyon, I kler ki zot still pa konn larepons sa kestyon.

Me si zot, zot in sitan dekonekte avek sa pep, si zot, zot in sitan opoz tou keksoz, ki menm ler zot ti dan Gouvernman, zot ti pe opoz zot prop lekor- e la ozordi zot ankor pe opoze- Prezidan Patrick Herminie avek US in demontre ki nou, ler nou fer en komitman avek sa pep, ki nou nou determinen pou delivre.

Prezidan in demontre dan zis 100 zour, kwa ki en Gouvernman ki met son pep premye I kapab realize.

Mon fyer pou vwar determinasyon sa nouvo lekip Statehouse **Madanm Speaker** ki pe travay pou soulaz lavi sa pep e redress nou pei.

Nou bann dirizan ti dir nou ler zot pou ariv State House ki keksoz pou sanze.

Ozordi, keksoz pe pozitivman sanze dan sa pei.

Pandan 5 an, US in mars port an port, parey nou dir kaz an kaz.

Noun koz avek nou bann frer e ser Seselwa, noun vwar bann sitiasyon deplorab.

Me pli enportan, nou'n ekoute.

E ozordi, sa nouvo ladministrasyon anba Prezidan Herminie pe delivre.

Madanm speaker

Dan son diskour leta nasyon, Prezidan Herminie ti devwal en vizyon pou lavenir nou pei, en gouvènmman ki travay pou lamazorite e pa zis pou serten.

Kot progre I gany mezire dan lavi sak sitwayen Seselwa e pa zis dan bann statistic dan rapor.

Kot Gouvernman I delivre, kot I annan latransparans e rann kont, kot nou ranforsi nou bann lenstitisyon e mentenir ‘rule of law’.

Prezidan ti osi koz lo dignite nou bann travayer e dimoun aze, loportinite pou lazenes, pli bon servis ledikasyon e lasante, transformasyon dan lafason ki nou servi teknolozi e bann lenvestisman ki nou bezwen fer.

Prezidan ti koz lo lantrepriz, larg lanmen sekter prive e fer li pli fasil pou Seselwa fer biznes.

I ti osi koz lo nou lanvironman e kiltir koman sa fondasyon pou en Sesel pli rezilyan, ini e prosper.

Dan sa diskour Leta la Nasyon, **Madanm Speaker**, pou bann ki annan zorey e ki ti anvi ekoute, zot ti tann en Prezidan dekrir son vizyon pou en nouvo letap nou devlopman.

Olye business as usual parey nou'n vwar dan sa dernyen 5an, Prezidan in azir e pran aksyon desisiv.

Olye aksepte mediokrite e letarzi koman en fason fer, kot larzan I gany met dan bidze me apre nanryen pa gany fer, olye rod leskiz e blanm dimoun, Prezidan Herminie in anmenn disiplin, standar, lanbisyon e vizyon dan gouvernans.

E atraver bidze 2026, nou pe vwar klerman ki direksyon kot nou pei pe ale.

Madanm Speaker,

Parey nou konnen, I annan bokou ki reve.

Bokou nou, nou koze e nou koz tre byen.

Bokou nou I vin avek bann gran gran plan me ler in ler pou met an aksyon, 'zero' napa okenn rezilta.

Bidze 2026 **Madanm Speaker**, I montre tre kler ki Prezidan Herminie I serye.

Ki I annan en lekip solid deryer li.

E ki ler Prezidan I fer en promes, I touzour essey son mye pou tenir son parol.

Monn koz avek bokou dimoun **Madanm Speaker**, e bokou I dir mwan ki si Gouvernman I reissir ekzekit son bann plan dan sa bidze, ki napa limit lo sa ki nou kapab akonplir koman en nasyon.

E mon agree **Madanm Speaker**.

Ozordi, mon le reassir lepep Seselwa, ki Gouvernman Prezidan Herminie e nou isi lo sa kote latab, nou determinen pou delivre pou mazorite Seselwa e pa zis pou serten.

Nou'n ekout Onorab Georges koze bomaten lo merit sa bidze.

E parey labitid, nou'n tann tou kalite largiman, leskiz e zoli parol.

Sa I nouvo Onorab George dan lopozisyon **Madanm Speaker**, ozordi I pe fer kwar ki I kalm, I rezonab, ki I pe anmenn bann largiman entelizan kan nou ti vwar son vre kouler ler I tin gany pouvwar.

Seselwa, Madanm Speaker zot latet I bon e zot pa bliye

Madanm Speaker

Mon annan en senp kestyon ki mon envit tou Seselwa pou demann zot lekor apre ki zot in ekout diskour Minis Laporte.

Eski nou vwar nou lekor dan sa bidze?

Pou bann travayer ki tin vwar zot bann benefis gany koupe.

Bann ki allowance tin gany retire.

Bann ki moral tin afeblir, mon le dir avek zot ki Prezidan Herminie I rekonet zot zefor.

Bidze 2026 I koz pou li menm **Madanm Speaker**:

En total 3.9 bilyon rounpi in gany met akote pou reminerasyon ek saler ki reprezant 11% nou GDP.

Bidze I montre klerman priorite Gouvernman ki rekonet ki travayer sektè piblik pa en fardo me I plito sa lafors endispensab ki delivre lo bann servis e program Gouvernman.

Mesaz I kler pou nou bann travayer: Gouvernman I valoriz zot travay e bann ki travay pou sa pep I devret gany trete avek respe e dignite.

- Nou'n vwar dan bidze alor ki Long Service Allowance in gany re-entrodwir a en sonm SR 14 million.
- Nou'n vwar 13enm mwan saler pe gany peye annantye -en sonm SR 42 million. E menm 5 milyon rounpi ki pe gany kontribye pou siport bann pti biznes pou pey zot bann travayer.

Madam Speaker, sa bann mezir I reflekte prensip lazistis.

Gouvernman Prezidan Herminie pe dir klerman ki ler ou travay dir, ler ou resté dan en lanplwa pou en kantite lannen, ki travayer I merit gany rekonet e ki zot merit stabilite dan zot saler e zot bann benefis.

Mon kontan vwar ki Gouvernman pe osi siport bann pti biznes pou rekonpans zot bann travayer.

Sa bidze pe asire ki dwa travayer I gany proteze san ki presyon adisyonel I gany mete lo bann pti biznes.

Madam Speaker,

An sa ki koncern gratitite travayer sektè piblik, kin osi ogmante, mon kontan vwar ki bann benefis in pli zomwen double, sorti 10, 000 pou 5 an servis pou vin 20, 000 rouni e 30 000 rouni pou 45 an servis pou vin 60, 000 rouni.

Sa 13 milyon roudi ki Gouvènmàn in prevwar dan bidze I reflekte ankor lenportans nou bann travayer e ranforsi en kiltir kot travay dir e devouman I gany rekonet e rekonpase.

Bann travayer ki lo kontra PSC, pe osi vwar zot bann benefis gany re-etablir.

En sonm anviron SR10 milyon roudi in gany met dan bidze e mon asire ki sa a relev moral bann travayer ki tin vwar zot bann benefis gany koupe.

Madanm Speaker

Sa se gouvènmàn pou lamazorite e pa zis pou serten.

Mesaz ki bidze pe pase se ki napa okenn metye ki pli nob ki en lot.

Tou travay I annan son merit e son lenportans e sak travayer e I devret gany rekonpanse dan en fason ki zis.

I pa akòz serten nou I al liniversite, ki nou annan bann gran tit devan nou non, ki nou kwar nou pli siperyer ki lezot.

Non **Madanm Speaker**, vre limilite e lasazes ler ou dirizan, se pou servi sa pouvwar ki ou gany, pou ed lezot monte e non pa abes zot.

Atraver bidze 2026 **Madanm Speaker**, sa prensip i gany reflekte tre klerman.

Napa problem si bann ki anler I le met palto.

Problem I ler nou ekspekte sa ki anba I mars touni ler nou nou le abiye.

Mon kontan vwar alor ki bann benefis, gratite e allowance travayer Seselwa in gany remet an plas.

Byensir konteks, kalifikasyon e nivo responsabilite I bezwen gany pran an konsiderasyon.

Me se prensip ki enportan **Madanm Speaker**, en prensip ki baze lo lazistis e kin sorti tre kler dan sa bidze.

Olye get zis nou lekor ek bann ki obor nou, bidze I fer provizyon pou nou regard bann ki osi lwen, bann ki nou kwar pa enportan, bann kin gany rezete e bann kin tonbe.

Se sa ki nou apel gouvernans avek konpasyon, en leker pou tou Seselwa.

Se sa ki nou apel ‘for the many, not the few.’

Madanm Speaker

Bidze 2026 I osi prevwar revizyon dan bann kad saler spesifik ki pou gany enplimante an zilyet sa lannen pou en sonm 27 milyon rounpi.

Mon kontan ki lapey bann ansenyan pe al gany revwar e kot 23 milyon rounpi in gany bidzete pou fer bann azisteman nesaser.

Anplis, travayer sosyal, bann administrater kot bann homes pou bann dimoun aze, staff mize nasyonal, departman housing e lezot ankor enkli life guards pou osi vwar zot bann kad ganny revwar.

Sa sonm 54 milyon rounpi aniyel ki pe gany prevwar I ankor demontre ki Gouvernman Prezidan Herminie I rekonet rol esansyel ki nou bann travayer e profesyonel I zwe dan fonksyonman nou pei.

Bidze **Madanm Speaker** I osi prevwar en revi striktir sekter piblik ki enkli en revi saler dan sekter prive e piblik.

Mon kontan vwar ki sa size inegalite dan lapey travayer, sirtou sa gran diferans ant saler pli o e sa ki pli ba pe gany adrese.

Madanm Speaker, pou touzour annan diferans dan saler akòz nou nivo konpetans, responsabilite, kalifikasyon e leksperyans I diferan.

Me I bezwen annan en limit dan sa inegalite ki ekziste ant bann diferan travayer.

I annan en diferans ant sikse e ekse.

Mon kontan pou vwar ki sa size inegalite pe gany adrese akòz **Madanm Speaker**, nou pa kapab defini en dimoun atraver kantite larzan ki I annan.

Ankor, la mon le tous lo sa size National Living Wage ki Minis Laporte in koz lo la.

I kler ki sa saler minimum ki ekziste aktyelman pa reflekte pri lavi, espesyalman dan konteksts nou pti lekonomi.

Mon apresye zefor pou rekonet difikilte ki bann dimoun ki lo sa saler minimum I fer fas avek e pou etabli bann referans saler baze lo kou en standar

lavi desan, enkli manze, lakaz, transpor, swen lasante, e lezot bezwen esansyel.

Madanm Speaker, sa 2 size ki bidze 2026 pe adres direkteman i vreman enportan.

I fasil dir avek Seselwa leve al travay, aret asiz obor semen.

Me realite ozordi **Madanm Speaker**, I ki bann zenn kin al etidye, bann graduates avek degree I dir nou ki zot osi zot pe struggle, ki zot bezwen swazir ant aste en transpor ou fer zot lakaz, swazir ant komans en fanmir ou develop zot karyer.

Le pwen **Madanm Speaker**, I ki I annan gro defayans dan nou bann sistenm e striktir ekonomik aktyel.

Mon pa en economist, me nou bezwen rod nouvo fason pou adres bann sitiasyon kot dimoun I vwar li pli atiran pou rod welfare ki rod en lanplwa aköz sa

larzan welfare I aktyelman parfwa plis ki ou gannyan si ou dan serten lanplwa.

Sa I realite **Madanm Speaker** e nou bezwen fran.

Nou pa kapab kontinyen repet bann gran largiman ekonomik liberal e ponp benefis en marse lib, kan larises ki noun gany dir pou trickle down I reste zis dan lanmen serten milyoner.

Nou pa kapab kontinyen demann profesyonel Seselwa kin ‘train’ dan en sektor pou reste e travay dan sa menm sektor kan I kapab gany en saler pli o dan en lot sektor menm ki si I pe fer en louvraz ki demann pli ba kalifikasyon ou konpetans ki I posede.

Nou pa kapab ekspekte Seselwa pou pran lanplwa dan domenn konstriksyon, lapas e lagrikiltir tan ki zot pa vwar vre rannman zot zefor.

Sanmenm rezon nou annan sa gran kantite travayer etranze dan sa bann sekter **Madanm Speaker**

Mon kontan alor, ki Gouvernman Prezidan Herminie in swazir pou pa zis koze, pou pa zis dir dimoun al rod travay e pou vin pli prodiktiv.

Non, Gouvernman Prezidan Herminie in atyelman dir atraver bidze 2026 ki sa sitiasyon pri lavi, saler, welfare, prodiktivite, distribisyon larises I bezwen gany analize dan son totalite.

Mon alor anmenn tou mon sipor pou demars pou revwar sa inegalite dan saler e lentrodiksyon en national living wage koman bann fason pou adres sa bann defayans dan nou lekonomi.

Nou bezwen fer li pli atiran pou dimoun leve e al travay, nou bezwen rekonet e rekonpans zefor e travay dir, nou bezwen kre en sosyete kot se mazorite lepep ki benefisye e non pa zis serten.

Madanm Speaker

Mon annan konfyans ki tou travayer Seselwa I vwar zot dan sa bidze ki Minis Laporte in prezante.

Gouvernman Prezidan Herminie in redonn nou bann travayer zot dignite e rekonet ki ler ou travay dir e delivre, ki ou bezwen ou osi gany rekonpase.

Mon demann nou bann travayer pou kontinyen ‘trust the process’, annou reste focus, annou delivre aköz anba sa Gouvernman, tou travay I enportan e sak travayer I annan en kontribisyon pou fer.

Mesaz Prezidan I kler: Travayer Seselwa I konpetan, zot bann adilt, zot responsab e I annan konfyans ki zot pou delivre.

Prezidan pa pe vin eksplwat travayer ou abes zot dignite atraver bann demann pou ranpli form pou gany zot l3enm mwan saler.

Prezidan i annan konfyans dan nou lafors travayer.

An sa ki konsern sekirite e proteksyon sosyal, ankor **Madanm Speaker**, Gouvernman Prezidan Herminie atraver sa bidze in montre diferans tre kler ant en filosofi US ek en filosofi kapitalis LDS.

Alokasyon pou Lazans Proteksyon Sosyal in ogmante pou vin SR 1.66 billion — en logmantasyon 27% lo sa ki tin gany prevwar pou 2025.

En sonm SR 62 million in osi gany met en kote pou bann social safety net.

Bidze In osi fer provizyon pou

- Laz retret desann sorti 65an pou vin 63an.
- Sekirite sosyal in ogmante par SR 800 depi Zanvyè 2026 e Gouvernman in target en sonm 10,000 rounpi ver lannen 2029

- Lasistans pou bann child care in osi ogmante par 750 rounpi par lannen pou bann paran ki pe ganny en saler SR8555.50 par mwan.

Madanm Speaker

Sa bann mezir I montre ki malgre I annan rezerv dan labank, malgre lekonomi pe fer tre byen parey noun gany dir, ki realite parey Minis Laporte in dir I ki pou lamazorite Seselwa, sirtou bann fanmir avek en reveni ba e bann ki pli vilnerab, lavi ti pe vin de pli an pli difisil.

Minis in fer nou rapel ki travayer ti pe ganny bokou difikilte pour fer fas avek lavi toulezour.

Nivo lavi ti pe degrade de zour an zour.

Madanm Speaker

Prezidan Herminie atraver bidze 2026 in koriz sa bann lenzistis sa dernyen 5an.

Nou pa kapab fer politik lapovrete avan eleksyon e
ler nou o pouvwar nou ferm tou sa bann
lenstitisyon, lazans, program e servis ki ti an plas e
dir dimoun al rod en travay.

Prezidan Herminie I annan respe pou lepep
Seselwa, e kot I konsern dignite sa pep, nou
Gouvernman pa pou fer okenn konpromiz.

Madanm Speaker

En lot domenn kot nou Gouvernman in montre
klerman son komitman se re-etablisman URS.

Nou tou ozordi nou konn lanpler problemn drog e
ladiskyon sirtou sa kantite zenn ki pe gany afekte.

I malere ki Gouvernman LDS ti deside ferm sa
scheme e demand sa bann dimoun pou ankor al
travay.

Madanm Speaker

Parey monn dir, I fasil koze e dir dimoun al travay.

Me I senpleman malonet e iresponsab pou pran en tel lapros akòz I kler ki problemn adiksyon I konpleks e ki souvann fwa nou pe deal avek bann dimoun ki bezwen bann servis spesyalize.

Konbyen zenn kin seye al travay me ki bann anplwaye I refize pran zot akòz zot senpleman napa kapasite e konesans pou deal avek defi ki lye avek problemn adiksyon?

Gouvernman LDS in zis koze pou 5 an, zot in zis kondann dimoun, olye rekonet konpleksite problemn adiksyon, zot in fer politik metadonn e met retar dan bann program e servis reabilitasyon kin ekziste lo nivo nasyonal.

Mon siport Prezidan Herminie pou bann mezir pou rekonet sa koman en problemn ki konsern Lasante piblik.

E mon kontan vwar ki bidze in fer provizyon pou osi enkli sa eleman lanplwa dan zefor reabilitasyon.

Mon asire ki sa 180 dimoun ki pou lo program URS sa lannen e ki pou gany en allowance 5, 800 roudi par mwan I gany sa lankourazman e sipor pou fer sa zefor spesyal pou amelyor zot lavi.

Madanm Speaker

Sanmenm ki nou apel en bidze kot sak Seselwa I kapab vwar li ladan.

Pou bann ki tin santi zot tousel, abandonnen, sa bidze pann kit ou deryer.

Kot ladministrasyon LDS ti prioritiz rezerv, Prezidan Herminie I dir wi, rezerv I enportan, me Seselwa pa kapab soufer an silans dan lapovrete.

An sa ki konsern lakaz Madanm Speaker

Pandan sa dernyen 5an, zis 436 lakaz in gany delivre.

E la mon le tous lo en statistik ki demontre klerman ki kalite Gouvernman nou'n annan pou sa dernyen 5an.

An 2025 **Madanm Speaker**, en total 79 proze ti ganny aprouve anba 'scheme' reparasyon lakaz, me parey Minis Finans in dir, malerezman zis 4 ki ti ganny enplimante.

Nou Gouvernman pa vin zwe avek byenet, sekirite e lavenir fanmiy Seselwa **Madanm Speaker**.

Diferans I kler:

Kot ti annan letarzi e kot bann dirizan ki dan konfor pa apresye soufrans dimoun ki ankor pe rente pou gany zot prop lakaz, Gouvernman Prezidan Herminie pou fer son mye pou delivre.

Mon siport langazman Gouvernman pou delivre plis ki 200 lakaz abordab e plis ki 120 apartman pou

bann profesyonnel an 2026 atraver en alokasyon SR 489 milyon dan bidze.

Sa ki osi ankourazan **Madanm Speaker**, I ki Gouvernman I anann en plan kler e in fini konmans bann travay preparasyon pou en lot 428 lakaz abordab ek 410 apartman pou profesyonnel partou lo Mahé, Praslin, ek La Digue.

Minis Laporte in osi anonse ki Gouvernman pe osi planifye ankor 1,000 ziska 1,200 younit lakaz lo Ile Aurore avan lafen 2030, avek soutyen bann partener bilateral

Pou bann ki pe esper later mon dir zot ki bidze 2026 in fer provizyon pou zot.

150 morso later rezidansyel pou gany delivre sa lannen.

Parey Prezidan ti anonse e Minis in konfirmen, lobzektif se redwir sa waiting list par en tyer sa lannen.

Pou annan bann morso adisyonel ki pou gany delivre lannen prosen.

Diferans I kler **Madanm Speaker**

Nou Gouvernman I determinen pou konstrir lakaz.

Nou determinen pou delivre.

E mon swete ki ver lafen lannen, ki bokou fanmiy Seselwa a pe zouir en meyer lavenir dan zot nouvo lakaz ou pe konmans fer demars pou kontriksiyon.

Madanm Speaker

Nou Gouvernman I planifye pa zis pou demen me osi pou lavenir.

Lanons ki 570, 000 met kare later pou gany kre atraver proze konblaz I montre ankor en

Gouvernman ki regard pli lwen ki sa prosen 10 ou 20 an.

Se sa kalite planifikasyon ki nou bezwen **Madanm Speaker** e nou bezwen investi e konstrir si nou le asir en nivo devlopman ki soutenab e ki benefisye mazorite nou popilasyon.

Madanm Speaker

Size pri lavi I reste en defi pou nou pei.

Parey Prezidan ti dir dan son diskour leta nasyon, Sesel ozordi I pei pli ser dan lafrik.

Nou bann leaders, nou konn bann realite ekonomik.

Me sa pa rezon pou nou reste lebra kwaze.

Ler bann zenn paran I dir nou zot pa kapab pey daycare, ler nou bann retrete I dir nou ki sa larzan sekirite sosyal pa ase, ler bann travayer I dir ou ki zot bezwen fer gran sakrifikis zis pou donn manze zot

zafan e pey zot bill, I nou devwar pou anmenn bann solisyon pou soulaz nou popilasyon.

Mon siport Minis ler I dir ki Gouvernman pou entrodwir en ‘Maximum Retail Price’ lo en nonm komotide esansyel tre limite pou anmenn en soulazman pou nou pep.

Madanm Speaker

Mon konpran tre kler largiman Minis ki malgre nou reste angaze ver en marse lib, nou bezwen osi rekonet ki dan en pti pei parey Sesel, marse lib I osi annan son bann defayans.

Nou pa kapab reste prizonyen bann filosofi ekonomik ki malgre zot dir nou en keksoz an teori, an realite benefis pa ariv kot popilasyon.

Olye larises trickle down, nou vwar ki I reste anler kot zis serten ki benefisye.

Sa Madanm Speaker

Pa en sistenm ki mars pou mazorite.

Mon kontan vwar ki Minis in anons bann mezir imdeya ki pou benefisye nou bann fanmiy.

La mon le refer lo rediksyon dan pri bann komodite esanyel e diskisyon kin deza konmase avek bann partener.

Bokou Seselwa I akey lanons ki 12 nouvo komodite esansyel pe al gany azoute lo lalis STC e sa ankor I reflekte en Gouvernman ki determinen pou adres sa size pri lavi.

Relansman kart STC I osi en lot pa pozitiv dan sa demars e mon konnen ki sa pou en gran soulazman pou bokou fanmir.

Madanm Speaker

Rediksyon dan pri bis, demars pou revwar to lentere, kou lenerzi e kou bann servis telekominikasyon I osi bann mezir dan bidze ki pou asire ki sa size pri lavi pe gany adrese dan en fason kordinen e avek konsiltasyon avek bann partener neser.

Sa ankor I montre langazman gouvènmman Prezidan Herminie pou siport nou bann fanmiy, espesyalman bann ki pe viv lo en saler minimum.

Madanm Speaker,

Bidze 2026 I reflekte lefe ki ledikasyon I fondasyon pou sa transformasyon nasyonal ki a la baz vizyon Prezidan Herminie.

Avek en alokasyon **SR 1.15 billion**, nou Gouvènmman pe fer kler ki lavenir nou pei pe gany konstrir dan nou bann laklas.

En sonm **SR 642 million** in gany dedye pou saler dan sa sekter e sa I rekonet ki okenn sistenm lediskasyon pa kapab avanse san valoriz son bann ansenyan.

Pou tro bokou letan, noun vwar bann ansenyan kalifye avek bokou lannen leksperyans kite pou al rod en lot travay e menm forse pou al travay aletranze.

I malere **Madanm Speaker**, Ki bokou ansenyan Seselwa in gany sa rekonesans e rekonpans dan en lot pei ki zot pann gannyen dan zot prop pei.

Mon le fer en lapel avek Minis Ledikasyon, silvouple, annou aprann bann leson e annou pa repet menm fot.

Mon rapel sa dikton, ki par deryer sak Prezidan, sak enzenyer, sak dokter I en annsenyan kin donn

lankourazman, kin donn sipor e kin enspir bann lakonplisman e sikse.

Me vre valer e kontribisyon nou bann ansenyan I dan sa nasyon ki zot edike e ekipe pou debout lo son prop lipye.

Mon sezi sa lokakazyon pou remersi nou bann ansenyan pou zot devouman e dir zot ki Bidze 2026 pa pe zis fer provizyon pou bann reform nesaser.

Bidze pe investi dan reform e pe dir zot nou bann ansenyan ki zot annan en rol kle pou zwe.

SR23 milyon in gany mete pou revwar saler bann ansenyan e provizyon in gany fer pou 2000 laptop pou ekip nou bann edikater avek resours e lasistans nesaser pou asire ki benefis teknoliz I gany entegre dan nou bann lekòl.

Mon anann konfyans ki nou bann ansenyan a sezi bann loportinite, ki zot a kontinyen kontribye lo tou

nivo e ki ansanm nou ava anmenn bann rezilta neseser dan sa sekter.

Madanm Speaker

Mon kontan vwar ki Gouvernman pe redonn lenportans ledikasyon avanse atraver re-etablisman Lazans pou Devlopman Resours Imen Nasyonal.

Ki Youth Hope Centre ki pou delivre ledikasyon alternativ pe gany finansman neseser osi ki bann program pou zanfan avek otism.

Ki SR 6.5 milyon in ganny bidzete sa lannen pour proze ‘Smart Education’, ki’n deza komanse dan kat lekòl segonder.

Sa Madanm Speaker, I montre ki napa okenn zanfan Seselwa ki pe gany kit deryer anba sa Gouvernman e ki tou zanfan Seselwa I annan son plas dan nou sosyete.

Bidze 2026 **Madanm Speaker**, I devret reassir tou paran ki Gouvernman I kwar dan en sistenm ledikasyon ki serye, kot I anann disiplin, kot I annan loportinite e kot nou donn nou bann zanfan pli meyer loportinite pou pran labar nou pei demen.

Madanm Speaker, sa sonm 1.15 bilyon rounpi pou sekter ledikasyon dan bidze 2026, I pa zis en depans.

Sa sonm I reflekte en lenvestisman dan nou zanfan e lavenir sa nouvo Sesel ki nou pe konstrir anba Gouvernman Prezidan Herminie.

Madanm Speaker,

Sa bidze I osi ranfosi lenvestisman dan nou lazenes an sa ki konsern lanplwa e devlopman bann konesans.

Skills Development Programme in agrandir e prezan bann zenn aze 15an ziska 20an I kapab partisipe.

Sa I vreman pozitiv e mon swete ki sa apepre 250 a 300 partisipan ki anbark lo sa program par lannen I sezi sa loportinite pou anrissi zot lekor pou ki zot osi kontribye dan developman pei.

Scheme ‘My First Job’ osi pe gany ranforsi e apepre 180 zenn par an i ekspekte benefisye, e bann partisipan pou resevwar en alawens SR 5,800.

Madanm Speaker, sa I en lapros ki baze lo realizasyon ki nou bezwen investir dan nou bann Zenn e ki I pa zanmen tro tar pou okenn zenn vin devan e sezi loportinite ki Gouvernman Prezidan Herminie pe met a zot dispozisyon.

Madanm Speaker,

Lasante nou popilasyon I reste en priorite nou Gouvernman.

Avek en bidze 1.42 bilyon pou sa sekter, ki reprezant 12% bidze total, Lasante I reste parmi sa 3 sekter avek pli gran finansman bidzeter.

I kler ki nou Gouvernman I reste angaze pou sofgard Lasante nou pep, aköz en pep ki an bonn sante I prodiktif e asir koezyon sosyal nou nasyon.

Dan sa konteks **Madanm Speaker**, mon apresye ki Gouvernman in met en alokasyon SR 42 milyon e SR 5.5 milyon pour Lazans Prevansyon Labi Drog e Reabilitasyon (APDAR) e Lazans Swen Lasante Mantal, respektivman.

Sa ankor **Madanm Speaker**, i reflekte diferans avek ansyen administrasyon.

Nou pa kapab zis koze e kwar ki problemn drog pou disparet.

Nou pa kapab zis ziz dimoun kin tonbe.

Nou pa kapab tret problemn an izolasyon kan sours problemn In anrasinen atraver diferan domenn.

En Gouvernman ki responsab e ki kwar dan dignite sak son sitwayen I devret fer li son devwar pou aport soutyen e servis bann kin tonbe.

E I devret fer sa dan en fason ki rekonet e apresye lanplè defi, ki kapab vwar bann relasyon e koneksyon ant bann size, ki anmenn bann lapros e solisyon kordinen e ki met resours dan servis e program.

Mon kontan ki Nou Gouvernman I apresye defi e rekonet konpleksite problemn adiksyon e lyen ki I annan avek Lasante mantal.

Bokou fanmiy in byen akeyir sa bann lanons Prezidan Herminie dan son diskour leta la nasyon e Minis Laporte atraver bidze in montre ki

Gouvernman I serye e pou siport lagrandisman bann program prevansyon, servis reabilitasyon, e zefor sansibilizasyon piblik, tout an asiran ki bann ki ganny afekte i resevwar swen, dignite, e sipor ki zot merite.

Madanm Speaker,

Bidze 2026 I ranforsi devlopman lo nivo nou bann kominote.

Sa alokasyon **SR 26 million** pou bann pti proze distrik , akote sa **SR 10 million** pou proze semen kominoter pou sertenman anmenn plis sekirite e konfor pou nou bann zabitin.

E la Madanm Speaker, Koman reprezantan elekte pou distrik Anse Royale, mon oule servi sa lokazyon pou koz direkteman avek bann zabitin mon distrik

Bidze 2026, I delivre dan en fason konkret pou nou distrik.

Travay renovasyon lo lekòl Anse Royale Segonder pou kapab komanse finalman avek en alokasyon 1.5milyon rounpi.

Sa I pa pou zis amelyor lanvironman pou bann etidyan aprann me osi lanvironman travay bann ansennyan.

Mon fyer pou dir ki sa proze Anse Royale Sports Complex, ki LDS tin promet me ki zanmen tin komanse, pou sa lannen komanse avek provizyon pou en sonm 6.4milyon rounpi dan bidze.

Se sa ki nou apel delivre **Madanm Speaker**

Me sa pa tou.

En sonm 8.2 milyon rounpi in osi gany prevwar pou bann indoor courts.

Zabitan Anse Royale in toultan kontan sport e mon felisit nou bann zenn kot lekol pou anmenn bon rezilta dan bann sanpyona atletik.

Me, sa sikse I osi travay bann ansenyan, zefor bann paran, sipor lakominote e byensir determinasyon zanfana e lazenes distrik.

Mon konfidan, ki la ki Gouvernman pe delivre lo sa bann proze, ki nou bann zabitan e lazenes ava pli ankouraze pou partisipe e kontinyen fer nou distrik fyer.

Mon kontan pou osi anonse ki Lakaz pou bann dimoun aze dan nou distrik pe al gany agrandir avek en sonm 9 milyon rounpi.

Sa Madanm Speaker

I montre ankor ki sa Gouvernman ki Prezidan Herminie I dirize, I pa zis koze me ki I delivre an sa ki konserne byenete e dignite nou bann dimoun aze.

An sa ki konsern proze lakaz, parey Minis Laporte in dir, 64 unit Cap Bonm Zan pou komanse atraver en don 102.3 milyon rounpi sorti kot Gouvernman Lasin.

Lasin I enn nou bann partener kle kin toultan la dan nou kote **Madanm Speaker** e lo non mon distrik e pei mon le eksprim mon rekonesans avek Gouvernman sinwan pou debout akote Sesel dan bo tan e move tan.

Bidze in osi fer provizyon pou en alokasyon 5.8 milyon rounpi Ex-Deltel dan bamboo pou later landbank.

Anse Royale pe kontinyen bouze **Madanm Speaker**.

Mon pa kapab nonm tou proze me mon le osi azoute ki SLTA pou met nouvo lalimyer e fer reparasyon lo

bann diferan semen segonder ki pou kontinyen amelyor akse pou bann motoris e pyeton.

E finalman mon le mansyonen ki bann zabitan distrik ki pli vilnerab, pou osi benefisye atraver sa sonm SR3 milyon kin gany dedye anba Poverty Alleviation Scheme.

Madanm Speaker,

Prezidan pa ti vin fer promes dan son speech leta nasyon.

Prezidan ti vin dir ki son plan e kote I pe anmenn nou pei.

Depi ki in pran lofis, Prezidan Herminie pe delivre.

Bidze 2026 **Madanm Speaker,** I ranforsi nou konviksyon ki wi, lepep Seselwa in fer en bon swa.

Ki wi, lepep Seselwa I dan bon lanmen

E ki wi, lavenir Seselwa I ranpli avek lespwar.

Madanm Speaker

Avan mon konklir mon le tous en pwen fondamantal bidze ki Minis Laporte ti prezante.

Ankor mon oule felisit Minis e son lekip kot Minister Finanse akòz sa bidze in gany fer dan en fason ki responsab e ki soutenab.

Pou bann ki ti annan konsern, bidze I montre ki ler Prezidan I dir trust the process, Prezidan I konnen ki I pe dir.

Madanm Speaker

Alokasyon total pou Bidze 2026 i SR 11.84 bilyon.

Sa i sonm kin gany planifye pou depanse— depi saler, servis piblik, led sosyal, ziska proze lenfrastruktir.

Reveni total, sonm Ki Gouvernman I ekspekte ranmase atraver tax, lezot reveni ek led ki nou resevwar avek nou bann partner in prozekte pou

ariv SR 12.28 bilyon.

Sa I fer **Madanm Speaker**, ki Gouvernman I ekspekte ranmas plis larzan ki I pou depanse, savedir en sirplis primer 550 milyon rounpi pou lannen 2026, ki reprezant 1.5% nou GDP.

Sa sirplis pou reste 1.5% an 2027 e pou ogmante pou ariv 2% an 2028.

An sa ki konsern debt, larzan ki noun prete e bezwen peye avek lentere, les mon dir **Madanm Speaker**, ki Gouvernman pe mentenir menm target ki tin gany etabli pou asire ki nou debt I ariv 50% nou GDP ver 2030.

Sa **Madanm Speaker** sa I montre en Gouvernman ki responsab e ki pe balans kwasans ekonomik avek devlopman nou dimoun.

Pou bann ki pa konnen, standar ki eropeen in devlope pou mezir det an relasyon avek zot GDP I 60%.

E nou Gouvernman Madanm Speaker, in komet nou lekor pou redwir nou det an relasyon avek nou GDP pou ariv 50% GDP ver 2030.

Sa I pli ba ki sa 60% ki eropeen I servi e I demontre disiplin e responsabilite nou Gouvernman anba Prezidan Patrick Herminie pou zer en lekonomi ki stab, ki delivre e ki met byenet lepep Seselwa premye.

Les mon dir **Madanm Speaker**, ki bidze 2026 I rekonet ki stabilite ekonomik I bezwen tous lavi toulezour nou pep.

Atraver sa bidze nou vwar en Gouvernman ki pe balans lanbisyon lepep Seselwa avek nou responsabilite kolektiv.

Sa bidze I enn ki realist, i reflekte laspirasyon nou popilasyon pou en meyer lavenir.

Sa bidze I fer provizyon pou nou rekonstrir.

Pou redonn sipor kot tin gany retire.

Pou redonn loportinite bann zenn kot zot tin gany neglize.

Pou revaloriz nou bann travayer kot zot tin gany abandonnen.

Pou redonn nou bann dimoun aze zot dignite.

Pou re-entegre bann kin tonbe dan lasosyete e fer en plas pou bann ki tin gany kit deryer pou zot osi kontribye.

Se sa lakonplisman bidze 2026.

Me bidze I osi prepar nou pou lavenir

Pou en Sesel kot travay dir I gany valorize e rekonpase

Kot bann pti biznes I gany lespas pou agrandir e sekter prive I vin sa vre moter nou lekonomi

Kot nou konstrir en leta ki pli efikas, ki rann kont e ki reponn bezwen son popilasyon

Kot nou redwir depandans e promouvwar prodiktivite

Kot nou moderniz nou bann lenstitisyon e met zot a zour pou adres bann defi aktyel

Kot nou agrandir nou larises dan en fason soutenab me osi asire ki I gany partaze

Madanm Speaker

Mon ti demann lepep Seselwa ler zot reflexir lo sa bidze pou demann zot lekor en senp kestyon.

Eski ou trouv ou dan sa bidze?

Si nou fran avek nou lekor **Madanm Speaker**, mon konnen ki tou Seselwa pou rekonet ki Gouvernman in esey fer en plas pou sakenn de nou dan sa bidze.

Travay pou lepep Seselwa **Madanm Speaker** pa en konpetisyon kot nou debat lo lekel kin met plis rezerv dan labank.

Travay pou lepep Seselwa I vedir ki ou konekte avek ou pep, ki ou santi son douler ler I pe plenyen e ki ou fer en zefor pou asiste li ler I dan bezwen.

Prezidan Herminie e son Gouvernman In montre nou atraver sa bidze ki I pe debout akote lepep Seselwa.

Bidze 2026 **Madanm Speaker** I re-anmenn lazistis sosyal dan nou sosyete.

I soulaz sa fardo 5 an ki lepep in anmennen.

Bidze I onor komitman pou en nouvo komansman.

I en bidze pou mazorite Seselwa.

E se pou sa rezon ki mon donn tou mon sipor
Prezidan Herminie e nou Gouvernman pou ki
ansanm nou anmenn Sesel ver plis prosperite e
progre.

Mersi.